

**LINANGKOB NGA LAKBIT-ASOY
SA SENTRONG LUWAN
UG SA KASAMTANANGANG KAMATUORAN
SA PAHIULI SA GINOO
SA DILI PA SIYA MOTUNGHA**

MAHINUNGDANONG MGA PAMAHAYAG

Ang “diamante” nga naa sa “kahon” sa Biblia
mao ang pinadayag nga nahimong tawo ang Dios
diha ni Cristo aron mahimong Dios ang tawo
sa kinabuhi ug sa kinaiya apan dili sa ranggo
sa pagka-Dios aron matukod ang Lawas ni Cristo
nga maghingpit sa Bag-ong Jerusalem.

Ang diosnon ug misticong ginsakpan
nga kasudlan nato karon ug kapuy-an nato
sa pagkatinuod dili man ang diosnon ug misticong
ginsakpan lang sa Tulo-usang Dios;
ang diosnon ug misticong ginsakpan kini
sa nahingpit nga Espiritu ug sa pneumaticong Cristo.

Ang pagpabilin diha ni Cristo, paghimo Niyang puluy-anan nato,
ug pagpapabilin Niya kanato,
paghimo kanatong puluy-anan Niya,
pagkinabuhi man diha sa realidad sa malukopong panagtagik
sa nahikay ug nahingpit nga Tulo-usang Dios
ug sa tinubos ug gipanganak pag-usab nga mga magtutuo.

Inumol ang Bag-ong Jerusalem
sa pagkadios ug pagka-tawo
nga gisagol, gisakot, ug gitukod nga usa ka persona;
pareho rag kinabuhi, kinaiya,
ug pagkamao ang tanang bahin
ug tungod niana hiniusang persona—
ang pangasaw-onon, ang asawa sa Cordero.

Mensahe 1

Ang Kinataposang Tumong sa Pamatigayon sa Dios— Nahimong Tawo ang Dios aron Mahimong Dios ang Tawo sa Kinabuhi ug sa Kinaiya apan Dili sa Ranggo sa Pagka-Dios aron Matukod ang Lawas ni Cristo nga Maghingpit sa Bag-ong Jerusalem

Basahong Kasulatan: Efe. 1:4-5; 5:26-27; Heb. 2:10-11; 1 Tes. 5:23

- I. Ang “diamante” nga naa sa “kahon” sa Biblia mao ang pinadayag nga nahimong tawo ang Dios diha ni Cristo aron mahimong Dios ang tawo sa kinabuhi ug sa kinaiya apan dili sa ranggo sa pagka-Dios aron matukod ang Lawas ni Cristo nga maghingpit sa Bag-ong Jerusalem:**
- A. “Human sa daghan kaayong tuig, gipaila ko sa Dios sa usa ra ka butang—nahimong tawo ang Dios aron mahimong Dios ang tawo sa kinabuhi ug sa kinaiya apan dili sa ranggo sa pagka-Dios. Kini ang bugtong-talagsaong luwan nako, ang bugtong-talagsaong mensahe nako” (*The Practical Way to Live a Life according to the High Peak of the Divine Revelation in the Holy Scriptures*, p. 27).
 - B. Ang walay kataposang pamatigayon sa Dios pagpasama man sa tawo Kaniya sa kinabuhi ug kinaiya apan dili sa ranggo sa pagka-Dios ug iusa ang Iyang Kaugalingon sa tawo ug ang tawo Kaniya, aron sa ingon niana mapadako ug mapalapad ang Iyang pagpadayag, aron mapadayag sa maayong kagawian sa tawo ang tanang diosnong kaayo Niya—1 Tim. 1:3-4; Efe. 3:9; 1:10.
 - C. Espesyal nga gilalang sa Dios ang tawo—sa Iyang dagway ug segun sa pagkasama Niya ug dunay espiritu nga mokontak ug modawat Niya; wala maglalang ang Dios og katawhan; gilalang hinuon Niya ang tawo segun sa Iyang matang—Gen. 1:26; 2:7; Zac. 12:1.
 - D. Nahimong tawo ang Dios aron dinaghan nga mahulad Niya ang Iyang Kaugalingon ug sa ingon niana makapalugwag bag-ong matang—Juan 1:1, 14; 12:24:
 - 1. Dili matang sa Dios o matang ba sa tawo kining bag-ong matang—Dios-tawo nga matang kini.
 - 2. “Ang luwan nako pagpakita man kaninyo sa klaro gyod nga ang pamatigayon ug plano sa Dios paghimo man Kaniyang tawo ug paghimo kanato, nga mga tawong linalang Niya, nga ‘Dios’ aron ‘ma-tawo’ Siya ug ‘ma-Dios’” ta (*A Deeper Study of the Divine Dispensing*, pp. 51-52):
 - a. Gipanganak ta sa dakong Dios, mao nga nahimo tang Dios sa kinabuhi ug kinaiya apan, natural, dili sa ranggo sa Iyang pagka-Dios; gitupong ta sa Dios nga dakong Tigsugod nato, ug mga anak ta Niya—Gal. 4:6; Isa. 63:16; 64:8; 66:12-13.
 - b. Nahimo Siyang Dios-tawo aron mahimong tawo-Dios ang tawo; sa kapulihay, Siya ug kita sama rag kategoriya, matang, ug pagkabutang.
 - E. Si Athanasius, nga usa sa unang mga amahan sa iglesia, niingon kalabot ni Cristo nga, “Gihimo Siyang tawo aron himoon tang Dios,” ug “Gihimong unod ang Pulong...aron kita, nga niambit sa Iyang Espiritu, mahimong Dios.”
- II. Ang labing matahom, maayo kaayo, mysteryoso, ug malangkobon-sa-tanan nga mga pagkatransporma sa walay kataposan ug Tulo-usang Dios sa pagkahimo Niyang tawo mao ang lihok sa Dios diha sa tawo aron mahuman ang walay kataposang pamatigayon Niya—Juan 1:14, 29; 3:14; 12:24; Buh. 13:33; 1 Ped. 1:3; 1 Cor. 15:45b; Buh. 2:36; 5:31; Heb. 4:14; 9:15; 7:22; 8:2:**

- A. Kining mga pagkatransporma mao ang mga kahikayang giagian sa Tulo-usang Dios sa pagkahimo Niyang Dios-tawo, nga nagdala sa Dios nganha sa tawo ug nagsagol sa Dios ug tawo isip sumbanan sa dinaghang paghulad sa daghang Dios-tawo; nahimo Siyang pagkalawas sa Tulo-usang Dios, nga nagdala sa Dios nganha sa tawo ug naghimo sa Dios nga makontak, mahikap, madawat, masinati, masudlan, ug mapahimuslan—Juan 1:14; 12:24; Col. 2:9.
- B. Gihisgotan sa Dios kining mga pagkatranspormaha sa Oseas 11:4 sa pag-ingon nga, “Gibira Ko sila pinaagi sa mga lubid sa tawo, / Pinaagi sa mga bugkos sa gugma”; ang pamulong *pinaagi sa mga lubid sa tawo, pinaagi sa mga bugkos sa gugma* nagpakita nga gihigugma ta sa Dios sa diosnong gugma Niya dili sa pagkabutang sa pagkadios kondili sa pagkabutang sa pagka-tawo; diosnon ang gugma sa Dios, apan nidangat kini kanato diha sa mga lubid sa tawo, sa ato pa, pinaagi sa pagka-tawo ni Cristo:
1. Ang mga lubid (ang mga pagkatransporma, ang mga kahikayan) nga pinaagi niini gidani ta sa Dios naglakip sa pagpakatawo ni Cristo, sa Iyang pagkinabuhi ingog tawo, pagkalansang sa krus, pagkabanhaw, ug pagkayab; pinaagi man ning tanang lakang ni Cristo sa pagka-tawo Niya nga nidangat kanato ang gugma sa Dios diha sa Iyang kaluwasan—Jer. 31:3 Juan 3:14, 16; 6:44; 12:32; Rom. 5:5, 8; 1 Juan 4:8-10, 16, 19.
 2. Bulag ni Cristo, dili gyod magmadaogon kalabot nato ang molungtad-sadayon nga gugma sa Dios, ang dili mausab, nagbuntog nga gugma Niya; madaogon ang dili mausab nga gugma sa Dios kay gugma man kini diha ni Cristo, uban ni Cristo, pinaagi ni Cristo, ug alang ni Cristo.
 3. Bisan sa atong mga kapakyasan ug kasaypanan, kanunayng modaog ang gugma sa Dios; molungtad ang gugma sa tanang butang ug makapabilin hangtod sa hangtod; ang gugma ray ilhanan sa hamtong nga tawo ug molungtad hangtod sa eternidad—Rom. 8:35-39; 1 Cor. 13:8-11; Jer. 31:3.
- C. Sukad sa kanhing mga panahon, sukad sa mga adlaw sa eternidad, nangandam ang Tulo-usang Dios nga mogula gikan sa eternidad nganha sa panahon, aron moabot uban sa Iyang pagkadios nganha sa tawo sa pagkahimugso Niya sa Bethlehem ingon nga tawo—Miq. 5:2:
1. Ang tuyo sa pagpakatawo pagdala man sa Dios nganha sa tawo ug himoong tawo ang Dios aron mahimong Dios ang tawo sa Iyang kinabuhi ug kinaiya apan dili sa ranggo sa Iyang pagka-Dios; Siya ang bugtong-talagsaong Dios nga simbahan sa mga tawo sa Iyang pagka-Dios, apan Dios ta sa kinabuhi ug sa kinaiya ra, dili sa ranggo sa pagka-Dios.
 2. Naa sa tawo ug pinaagi sa tawo ang lihok sa Dios nga himoong Dios ang tawo sa kinabuhi, kinaiya, kagamitan, ug pagpadayag apan dili gyod sa ranggo sa pagka-Dios; kay gipaambit na man sa atong espiritu “ang Espiritu nga Balaan,” usa ka espiritu na ta ug ang Espiritu (Rom. 8:16; 1 Cor. 6:17), ug “balaang espiritu” na karon ang atong espiritu (2 Cor. 6:6).
 3. Busa, isip mga Dios-tawo, dili gyod ta mobuhat og bisan unsa, moatubang og bisan unsang sitwasyon, o motagbo bag bisan unsang panginahanglan bulag sa malangkobon-sa-tanan nga Espiritu; ang paagi nato karon mao ang paglihok diha sa lihok sa Espiritu ug palihokon ang Espiritu diha sa lihok nato—Bug. 22:17a; Rom. 8:4; Gal. 5:25; Rom. 1:9; Fil. 3:3; itandi sa Ezeq. 1:15-21.
 4. Sa basahon sa Mga Buhat, nilihok ang tawo diha sa lihok sa Dios, ug nilihok ang Dios diha sa lihok sa tawo; tungod niana, nagsilbing Dios ang mga apostol, sa ato pa, ang Dios nga naglihok—16:6-10.

III. Ang pagkahimo natong Dios sa kinabuhi ug sa kinaiya apan dili sa ranggo

sa pagka-Dios gipasiugdahan sa Dios Amahan sa nilabayng eternidad sa pagpili Niya kanato aron mabalaan, gitudlo tang daan ngadto sa pagka-anak; ang diosnong pagbalaan alang sa diosnong pagkaanak maoy sentro sa diosnong pamatigayon ug ang sentrong hunahuna sa pinadayag sa Bag-ong Tugon—Efe. 1:4-5:

- A. Ang mabalaan kana mang maginahin ngadto sa Dios ug masuropan sa Dios nga Balaan, nga lahi, naglahi, gikan sa tanang kasagaran—1 Ped. 1:15-16; Efe. 1:4-5.
- B. Gipili ta Niya diha ni Cristo sa wala pa matukod ang kalibotan aron mabalaan para mahimo tang Dios sa kinaiya (v. 4); ang Dios ray Balaan; aron mabalaan ta nagkinahanglan ta sa Dios sa balaang kinaiya Niya nga ipaambit kanato, ug kining balaang kinaiya nahimong balaang elemento nga pinaagi niini gibalaan ta sa Espiritu Santo (2 Ped. 1:4; Heb. 12:14).
- C. Gitudlo ta Niyang daan ngadto sa pagkaanak bisan sa wala pa ta gilalang aron mahimo tang Dios sa kinabuhi (Efe. 1:5); aron mahimo tang mga anak sa Dios, ipanganak gyod ta sa Dios pinaagi sa pagpaambit sa kinabuhi Niya nganhi sa atong pagkatawo (Juan 1:12-13; 3:6; 1 Juan 5:11-12):
 - 1. Gipadayag sa Efeso 1:4-5 nga gipili ta sa Dios aron mabalaan sa tuyo nga mahimo tang mga anak sa Dios; ang mabalaan maoy kahikayan, ang paagi, samtang ang pagkahimong mga anak sa Dios maoy tumong, tuyo, aron “ma-anak” sa Dios (Bug. 21:2, 9-11) ang tibuok natong pagkatawo, lakip na ang atong lawas (Rom. 8:23).
 - 2. Gipadayag sa Mga Hebreohanon 2:10-11 nga gidala sa nabanhawng Cristo nga Kapitan, Mag-uugda, sa kaluwasan sa Dios, ang daghang anak ngadto sa himaya sa pagbalaan Niya kanila.

IV. Ang diosnong pagbalaan maoy nagkupot nga linya sa pagtuman sa diosnong pamatigayon sa paghimo kanatong diosnong mga anak, naghimo natong mga anak sa Dios aron masama ta sa Dios sa Iyang kinabuhi ug kinaiya (apan dili sa Iyang ranggo sa pagka-Dios), aron mahimo tang pagpadayag sa Dios; busa, ang pagbalaan sa Dios mao ang diosnon nga paghimong anak:

- A. Niingon ta nga ang pagbalaan maoy nagkupot nga linya tungod kay ang tanang lakang sa pagbuhay sa Dios uban nato pagbalaan man kanato; ang pagtuman sa walay kataposang pamatigayon sa Dios pinaagi man sa pagbalaan sa Espiritu—1 Tes. 5:23; Juan 17:17; Efe. 5:26-27; 1 Cor. 6:11; 12:3b; Heb. 12:4-14; Rom. 8:28-29; Efe. 4:30; 1 Tes. 5:19; Bug. 2:7a; Sal. 73:16-17, 25-26.
- B. Ang nangitang pagbalaan, ang sinugdang pagbalaan, ngadto man sa paghinulsol aron madala tag balik sa Dios—1 Ped. 1:2; Luc, 15:8-10, 17-21; Juan 16:8-11.
- C. Ang nagtubos nga pagbalaan, ang pagbalaan sa posisyon, pinaagi man sa dugo ni Cristo, aron mabalhin ta gikan ni Adam ngadto ni Cristo—Heb. 13:12; 9:13-14; 10:29.
- D. Ang nag-anak pag-usab nga pagbalaan, ang sinugdan sa pagbalaan sa disposisyon, nagbag-o nato sugod sa atong espiritu aron himoon ta, ang mga makasasala, nga mga anak sa Dios—ang bag-ong binuhay nga dunay diosnong kinabuhi ug kinaiya—Juan 1:12-13; 2 Cor. 5:17; Gal. 6:15.
- E. Ang nagbag-ong pagbalaan, ang pagpadayon sa pagbalaan sa disposisyon, nagbag-o sa atong kalag sugod sa atong hunahuna ngadto sa tanang bahin sa atong kalag aron himoong bahin sa bag-ong kabuhatan sa Dios ang atong kalag—Rom. 12:2b; 6:4; 7:6; Efe. 4:23; Ezeq. 36:26-27; 2 Cor. 4:16-18.

- F. Ang nagtranspormang pagbalaan, ang adlaw-adlawng pagbalaan, metabolicong nag-umol nato pag-usab sa elemento ni Cristo aron himoon tang bag-ong inumol nga bahin sa organicong Lawas ni Cristo—1 Cor. 3:12; 2 Cor. 3:18.
- G. Ang nagpasama-sa-dagway nga pagbalaan, ang naghulmang pagbalaan, nag-hulma nato sa dagway sa mahimayaong Cristo aron himoon tang pagpadayag Niya; ang pagkasama nato sa dagway mao ang pagkahamtong nato sa diosnong kinabuhi nga pinaagi niini hingpit tang makaambit sa pagkadios sa Dios ug malig-on sa pagpanag-iya sa diosnong elemento Niya—Rom. 8:28-29; Heb. 6:1a.
- H. Ang naghimayang pagbalaan, ang naghingpit nga pagbalaan, nagtubos sa atong lawas sa pag-usab sa dagway niini aron himoon tang hingpit ug mahimayaong pagpadayag ni Cristo—Fil. 3:21; Rom. 8:23.

V. Ang diosnon nga pagbalaan sa disposisyon gibuhay ni Cristo nga taghatag-og-kinabuhi, nagbalaan, ug namulong nga Espiritu—1 Cor. 15:45b; 1 Tes. 5:23; Efe. 5:26:

- A. Gibalaan ni Cristo nga Espiritung taghatag-og-kinabuhi ang iglesia sa paghinlo Niya niini sumala sa paghugas sa tubig diha sa pulong; sumala sa diosnong hunahuna, nagpasabot ang *tubig* dinhi sa nag-agay nga kinabuhi sa Dios nga gihulagwayan sa nag-agay nga tubig (Exo. 17:6; 1 Cor. 10:4; Juan 7:37-39; Bug. 7:17; 21:6; 22:1, 17); naa ta karon nianang kahikayan sa paghugas aron mabalaan ug mawalay apan ang iglesia.
- B. Ang Griyegong pulong sa *paghugas* sa Efeso 5:26 sa linetra *dulang*; sa Daang Tugon gigamit sa mga sacerdote ang *dulang* sa paghugas sa yutan-ong kahugaw nila (Exo. 30:18-21); adlaw-adlaw, buntag ug gabii, mobasa gyod ta sa Biblia ug magpahinlo sa *dulang* sa tubig diha sa pulong.
- C. Gigamit ni Pablo ang Griyegong pulong *rhema* sa naghigot siya sa pulong ug sa kahikayan niini sa paghugas (Efe. 5:26); ang logos mao ang Pulong sa Dios nga objectibong gisulat sa Biblia; ang rhema mao ang pulong sa Dios nga gipamulong kanato sa pihong okasyon (Mar. 14:72; Luc. 1:35-38; 5:5; 24:1-8).
- D. Isip Espiritung taghatag-og-kinabuhi, si Cristo ang namulong nga Espiritu; bisan unsang gipamulong Niya pulong man nga naghugas nato; wala kini magpasabot sa logos, sa makanunayong pulong, kondili sa rhema, nga nagpasabot sa dihadihang pulong, sa pulong nga gipamulong sa Ginoo kanato karon—Mat. 4:4; Juan 6:63; Bug. 2:7; 22:17a; itandi sa Isa. 6:9-10; Mat. 13:14-15; Buh. 28:25-31.
- E. Personal ug direktang dunay gipadayag ang rhema kanato; gipakita ta niini kon unsay angay natong batokan ug sa unsa ta angay nga hinloan (ang tumbagang *dulang* salamin nga makapasumbalik ug makabutyag—Exo. 38:8); ang importanteng butang alang sa matag usa nato mao kini—namulong ba ang Dios sa Iyang pulong kanako karong adlaw?—Bug. 2:7; 1 Sam. 3:1, 21; Amos 3:7.
- F. Ang usa ka butang nga kanunay natong gimahal mao nga personal ug direkta pa gihapong namulong ang Ginoo kanato karon; ang tinuod nga pagtubo sa kinabuhi nag-agad sa direktang pagdawat nato sa pulong gikan sa Dios; ang pagpamulong ra Niya kanato ang dunay tinuod nga espirituhanong bili—Heb. 3:7-11, 15; 4:7; Sal. 95:7-8.
- G. Ang sentrong punto sa atong mga pag-ampo mao gyod unta ang pangandoy nato nga mamulong ang Ginoo, nga makapatuman nato sa tumong sa walay kataposang pamatigayon Niya sumala sa gitinguha sa Iyang kasingkasing nga mabatonan ang diosnong pagkaanak Niya—Luc. 1:38; 10:38-42; Efe. 1:5.
- H. Sa praktikal kaayong kahulogan, nausa ang presensya sa Ginoo sa Iyang pagpamulong; mamulong ngani Siya, maamgohan nato ang presensya Niya sa

sulod nato; ang pagpamulong ni Cristo mao gyod ang presensya sa Espiritung taghatag-og-kinabuhi—itandi sa Exo. 33:12-17; Heb. 11:8.

- I. Ang pagpamulong ni Cristo nga nagpuyo sa sulod isip Espiritung taghatag-og-kinabuhi sa sulod nato mao ang tubig nga naghinlo nga nagbutang og bag-ong elemento nganhi nato aron pulihan ang daang elemento sa atong kinaiya ug taras; tungod ning metabolicong paghinlo dunay tinuod ug sulodnong pagkausab sa kinabuhi, nga mao ang realidad sa pagbalaan sa disposisyon ug pagtransporma.

- VI. **Ang pagbalaan kanato alang sa diosnong pagkaanak sa kinataposan mahingpit sa Bag-ong Jerusalem nga balaang syudad (Bug. 21:2, 10) ug kinatibukan sa diosnong pagkaanak (v. 7); kini ang kinataposang kahingpitan sa Dios nga nahimong tawo diha sa unod aron mahimong Dios ang tawo diha sa Espiritu aron mabatonan ang hiniusa, dakong Dios-tawo (vv. 3, 22) nga hiniusang magpadayag, maghimaya, sa Tulo-usang Dios (vv. 11, 23).**